

Pyar saba cir kaplāņ

Syaha fla

¹ Ndoos Pyar kē, ndoo wii n ma Yesu Crise tēnlēhē. N saba nwo yrūhū ye kē, yii mpāy Yāhā ye yāņ yi, yii mpāy ye cāāņ nii Pōn kāntraha na, Galasyi kāntraha ne, Kapada kāntraha ne, Yasyi kāntraha ne, ma suhu Bitini kāntraha ne. Ye ma nampay mpāy wo, pe wee Yesu kānde wo ye. ² Faale wo, Yāhā bii ye wāyāņyi wī ta, ma -sē bii ye yāņ yi. Yāhā Yrā kāmāy na, Yāhā ye laam wā klaha, ye n nii ke wām. Loo na, ye n waha naa n luhu Yesu Crise kaplāņ ye, tesē u ntāņ n waha ye kapee- yee laha kāā ye na gbēgbē. Yāhā ke ke laantār wī pye ye kē, ke maha yrīņ wāā ye kē.

Yesu kāndeyārfua u ya wāsyayaha wī cā wa

³ Yāhā gii ke ma wo Yīņfua Yesu Crise Tuhufua, -too naa ke sey! Yāhā wo fēn dī, ma wo ta wo n gbihi dur see laanfāyōm ne. Ke Yesu Crise ta u n yir gbā wo, ma dur ba yrāņ na gbaafa ye. Loo ne, wo n koho taha yaha Yesu na, ma yee wo ga ba cīinde yrā yāā Yesu kāmāy na, cīinde yrā lii wākuayāā wee le na ye. ⁴ Yāhā ke kloho gii gbihi ta yaha ke pii kē, wo ga maha ba ke yāā gbe yāhāyīņ fla wo. Koo kloho nge, wāfūhūyāā wee ke na ye, wāwluhuyāā wee ke na ye, ke nayōr saa maha kua yāā ye. ⁵ Yii mpāy tee Yesu ta ye Yatēr ma yee u fānga gboho, Yāhā fānga -sē ga naa n sēņ ye na driyē n sya ba kua, nawee- byē n ye wāsyayaha yāā yīnde ne.

⁶ Koo ngī wī na, -ye naa nuhu di! Wāfāy ter byē ma sya pye ye na, ma nii ye laam wlāhā ye kē yagaa nge na,

ke saa ma- ye. ⁷ Koo wāfāy nge, ke ma mii ke ye tăn n yāŋ, ye ma pye ye Yesu ta ye YatƎr cīinde. Sān gƎ, u wīī le ga waha kua kāā, u wīī -sē waha nawee- ye. Ta n yee pe yai pe u le naawraŋ wo, pe wor yēy yi u wo, u n nii sānyō? Tee Yesu ta ye YatƎr, le ma kayīī, ma tƎr sān gƎ yaha, le sē n tōr gƎ tōr ye. Kawlaŋ tesē wāfāy ne, ke ye dye ma ye tăn n yāŋ, le ma pye ye Yesu wāta wīī ye YatƎr, le waha ye laam wo cīinde. Le ma gboho ye laam wo cīinde, Yesu ma ba dur ba per gii, ye ga ba sey tee miingbāŋ yāā. ⁸ Ye sē Yesu yāā yāā yīnde ne ye, u ntāŋ -sē dye ye tāy. Yagaa nge gƎ na, tuu sē sya wee gbaa na ye, ye u ta ye YatƎr, ma nii nuhu di kacān wee te na ye. ⁹ Tee too nuhu di ke syi, ye cā ye Yesu ta ye YatƎr yīŋ gii na, ye ga ba koo yīŋ wīī yāā, koo kē. Koo yīŋ wīī ne, ye ga ba sukūhū gaa yāā, ye yrā bya ne.

¹⁰ Yāhā ke ga ba ye sya yaha koo wāfāy nge wo mii syi dyaŋ, faale Yāhā kaplaŋ tōrfa bii le fla kƎ. Yāhā ke ga ba kayīī lii pye ye kē, pe bii le cāā tōr yaha. ¹¹ U Yāhā Yīndefua Crise Yrā le -sē pye pe laam wo, le naa pe yar ma naa n yee, u Crise ga ba fāy gboho u cā u miingbāŋ yāā tesē u nayōr ne. Koo kai- ngīī ke yai ke pye mii syi dyaŋ tesē ke wāpyeŋ cāā ne, pe Yāhā kaplaŋ tōrfa bii koo byƎ kƎ kayi ne. ¹² Yāhā n -sē bii pe yar ma yee, kai- nkāy koo ke yar pe na u Crise wīī na, koo kai- ngīī saa pye pe yīnde na ye, ke ga ba pye yii poo yai na. Ke pye wa yagaa. Mpāy pe ma loo kapāyīī tōrfa nawee- ye, Yāhā Yrā Fānga ma pe ne, Yāhā Yrā lii Yāhā ke nō wāā pe ye. Koo kē pe n waha nii le Yesu kapāyīī tōr ye ye. Pe yāhāyīŋ tēnlehe gƎ naa loo nde wācāŋ kƎ.

-Too naa wo miingbāŋ kānde yār!

¹³ Loo ne, ta n ye yar: -Ye ye laam gbihi ta, ye naa Yāhā wūhū pye! -Ye naa yeŋsaha ta ye pyer na! Yesu Crise tuu

ga ba dur ba ye kē kayī lii ne, -ye koho taha yaha loo ya na! ¹⁴ -Ye naa n luhu Yāhā ye mii kicar dyaŋ pe tuhufua ne! Tee sē ba Yesu cā wa ye, ma naa kapee- nkāy pye, -ye ke miy yaha!

¹⁵ Yāhā gii ke ye yee, ke kai- laha. -Ye naa n laha ye kānkai- byε wo mii Yāhā wāŋ syi dyaŋ! ¹⁶ Le sē yrūhū la Yāhā sabangbāŋ wo ma yee, Yāhā yee:

«Ta kai- laha, ye bya -ye naa n laha
ye kānkai- byε wo ta wāŋ syi dyaŋ!»

¹⁷ Ye ma nii n pāā Yāhā ne, ye ne naa ke yee wo Tuhufua Yāhā. Tee ke yee ke syi, -ye naa ke myaha gboho ye kānkai- byε wo, ye ta ye pyer naa n sroŋ ke kaplāŋ ne! -Ye naa n nii koo syi ya driyē wo, ye kuper n sya ba nɔ. Ye sē yāā, Yāhā wo nanem byε sāhā wo pyer wī na wii wuhu na, nawee- wātyōr wee ye. ¹⁸ Ye cā Yesu ye par sya yi kāā ye wāε wākapyeŋ kānde wo, kānde lii pe bii yar ye na. Yesu Crise u ye par sya ngii ne, ke syi sē n tōr wale ne ye, ke sē waha n tōr kla gii goo syi ne ke n klaha- ye. ¹⁹ U ntāŋ wāwoo u ta ma ye yīŋ par sya. U Yāhā Yīndefua Crise gbā ku mpar draha wo mii mbapēŋ gii syi dyaŋ ke teelaa sē klaha- ye, ke sē maha wee teele laa ne fla ngaa na ye. ²⁰ Driyē gε sē bii tāhā wa ye, Yāhā -sē bii u Crise yāŋ yi ta wa. Yagaa, driyē ke n gaha kuasaha wo, Yāhā u gbe yi yar ye na, u ye sya yaha. ²¹ Yesu woo kē u ye ta ye n Yāhā ta ye Yatεr, ma maha koho taha yaha ke na. Yāhā kē ke Yesu ta u n yir gbā wo, ma dur ba yrāŋ na gbaafa ye. Loo kur ye, ke n nagboho ta u na, ma u ta u n dugu ga nii yāhāyīŋ na ke tāy ke kāndigi koho kuε ye. Le nii Yāhā gε kē, tee ta ye Yatεr, ma maha koho taha yaha koo ya na.

²² Tee Yāhā cīnde kapān maha yigi, ye ye laam yee laha wa gbεgbε. Loo nde ye ta, mpāy byε pe Yesu kānde yār, pe ntāŋ ga waha dye ye tāy. Ta n ye yar, ye tyii ye ntāŋ n

sronj naa n dye yii tãy, ye wĩ n gboho yii laam wo! ²³ Ye sē yãã, ye ma mii ye gbihi dur see laanfãyõm ne. N sē yee, ye see yi nawee pua wo ye. Ye see yi cĩinde yrã pua wo, loo lii le ma Yãhã kapãn, lii le cĩinde yrã wãã nawee kē. Yãhã kapãn loo na, wãkuayãã wee le na mii nawee kadye dyaŋ ye. ²⁴ Yãhã sabangbãŋ gɛ wo, le ma le yrũhũ yaha ma yee:

«Nawee- byɛ ma mii nyẽ wãŋ ter syi dyaŋ,
pe nayõr ma mii katyigi fyãr dyaŋ.

Nyẽ sē ne ba waha tãŋ la ke ku?

Katyigi fyãr sē ne ba too la te nayõr ne,
te wĩ n kua kãã?

²⁵ Ma sē yee, wo Yĩŋfua kapãn loo na,
le ga naa n nii yalebyɛ,
wãkuayãã wee le na ye.»

Loo kapãn nde ne, le ma Yesu kapãyĩ lii le tõr yar ye na.

2

Yãhã ke ntẽmlaha gii ta

¹ Loo na, -ye ye laampee wũhũ byɛ miy yaha, ye ma n fufor pye ye, ye ma n ye nampyeŋ wlaŋ le kapee wo ye, ye ma n nii yĩnkãhã sãnsyãŋ ne ye, ye ma n naa yĩnde pye ye, ye ma n wãpee pãã waa wĩ na ye! ² Ye cã yĩm n tãy pẽyãhã ye, u yĩm wãr ma n lɛ. Ye bya, -ye nii pẽyãhã wãŋ ter syi dyaŋ, -tee ta Yãhã kapãn wĩ naa n tãy ye ye, le Yãhã kapãn lii le sronj, ma laha, kapee carle laa gɛ sē wlãhã le wo ye. -Ye le le naa n yaha ye laam wo yalebyɛ! Loo na, Yãhã cĩinde wĩ ga gboho ye laam wo, ye n lɛ Yãhã kãnde wo. ³ Ye Yĩŋfua wĩ cã, ma maha u laantãr wũhũ yãã gboho, ma cã ye wĩ gboho u laam wo.

⁴ -Ye yũhũ dye Yĩŋfua Yesu tãy! U sē ku ye, u ma yrãŋ na, woo kē nwoŋ nakũy ntẽmlaha Yãhã ye. Nawee- u sye, pe sē u ta ngaa ye. Yãhã -sē cãã bii woo yãŋ yi, ma

yee u tɛr wān byɛ yaha. ⁵ -Ye yūhū dye Yesu tǎy, tee tyii Yāhā n ye ta ke kangbāŋ fǎā ye ne, Yāhā Yrā n dye nii ke wo. Yii tee ga maha ba nii koo Yāhā kangbāŋ nge yūndefa, ye naa ke sey ye laam fānga byɛ ne, tee yii le soho ke koho wo ye kuāŋ ne mii diŋ wāŋ syi dyaŋ. Ye ga ba naa koo pye Yesu Crise myaha ne, loo le ga naa n tǎy Yāhā ye. ⁶ Yāhā sabangbāŋ wo, le ma le yrūhū ta ma yee, Yāhā yee:

«-Ye yāŋ, n nwo,

tē cāā nwonfāā ntēmbangbāŋ gaa yāŋ yi ta
klo nde wo pe n yee Yurusalɛm.

Koo ke ma ke nwoŋ yīŋ.

Ntēmbar nde byɛ ga ba fǎā tǎ taha koo na.

Ke tɛr wān byɛ yaha.

Koo kē tē yāŋ yi.

Wii ma koo ntēmbangbāŋ nge wīi sya cīinde,
fyar wīi laa saa ufua dye yāā ye.»

⁷ Yii mpāy tee ke wīi sya cīinde, ke ma ye ye yīŋ ne, ke tɛr wān byɛ yaha. Ma -sē yee mpāy na, pe sē ke wīi sya cīinde ye, yīŋ wee ke na poo ye ye. Le ma le yrūhū ta Yāhā sabangbāŋ wo ma yee:

«Ntēmlaha gii nwonfāāfa ke sye,

Yāhā ke gbe ma ke ta,

ke n sya yīŋ yāā ke nwonfāā na.»

⁸ Le maha yrūhū ta ma yee:

«Koo ntēmlaha kē,

nawee- mpāy n pai naa n kūn ke na,

pe laha naa n too.»

Pe Yāhā kapāyī sye, loo ne pe n kūn ke na, ma n too. Yāhā le ta ke syi.

⁹ Yii poo na, tee Yesu wīi sya cīinde, Yāhā ye yāŋ yi. Ye ma u Yīŋfua yūndefa. Yāhā ye ter yāŋ yi ma ye ta ke wām, ye kānkai- n naa n laha. Yāhā ye yee yi wam wo, ma ba ye le ke cāā- wo, cāā- mpāy kacān wee pe nayōr na ye. Ke ye

yāŋ yi, ma yee ye naa Yāhā kayūhū yar nawee- na. ¹⁰ Faale wo, ye sē pye Yāhā wām ye. Yagaa woo, ye ma Yāhā wām. Faale wo, ye sē ba cā ma yee Yāhā ye fēn di ye. Yagaa tee -sē le cā, ye Yāhā kayī yāā.

Yāhā tēntēfua yai u naa n pye mii?

¹¹ Ta naambiyām, n ye nar laa ne. Ye cā ye ma nampay driyē nge wo, plii raa ya tee ga pye ke wo. Loo na, ye laam wūhū nkāy ke sē n gaha Yāhā kuε ye ye, -ye ke miy yaha, ke ma n naa ye wlāhā ye saha Yāhā laam wīi pye ye.

¹² Mpāy pe sē Yāhā cā ye, tee mii ye wlāhā nii pe laam wo, -ye ta ye pyer n yō! Pe ma sya kawar fua n taha ye na, ma yee ye ma kapeepyefa, pe yīnde ma ye kayūhū na tee n pye. Ke syi ne, Yāhā ma ke yīŋ yi pe ye per gii, ye kayūhū ga ta pe n ke sey.

¹³ Tee mii tee Yīŋfua Yesu kānde yār, -ye yīŋ kor naa n le yīŋfa ter byε ye kāntraha nge na! Tee naa n luhu ye kāntraha yīŋfua ye, woo wii fānga kur byε ma u koho wo!

¹⁴ U yīŋfua tuu mpāy yāŋ yi, ma pe taha yīŋ na u kāntraha kui byε wo, -ye naa n luhu pe bya ye! Poo mpāy, nawee ma kapee pye, pe ga u pēn, wii ma -sē kayī pye, pe ga u sey. ¹⁵ Ye sē yāā, Yāhā n kε ye naa kayūhū pye, ye ta, mpāy pe sē n kε pe kai- cā ye, tesē mpāy ne pe plege, pe ma n waha naa wāpee pāā ye wīi na ye. ¹⁶ Yagaa, ye yi kāā yāmpar raa ter fānga koho wo. Loo na, lii ma tāy ye ye, ye ga waha loo yāŋ gbe. N sē -sē yee, ye kapee- wāpyeŋ kānde loo gbe ye wāsyayaha flāhā tāy ye. -Ye naa ye troho tāhā nawee- n waha cā, cīinde Yāhā tēntē- me ye ne. ¹⁷ -

Ye naa nagboho ta nawee- byε na; mpāy byε pe ma Yesu kāndeyārfa, ye tyii pe ntāŋ n naa n dye ye tāy; -ye naa n fya Yāhā koo na, -ye naa n luhu nawee- yīŋfuangbāŋ ye!

-Ye naa n yāŋ ye Yāhā Yīndefua Crise na!

¹⁸ Těntě-, -ye yīŋ kor naa n le yīŋfa kě, -tee naa n fya pe na! Mpāy pe ma ye yīŋfa, pe ma naweeyōm woo, -ye naa n luhu pe ye, pe wee naweeyōm woo, -ye naa n luhu pe ye! ¹⁹ Ye sě yāā, taa sě yai wāfāy gii ne ye, pe ma ma fāy koo wāfāy nge ne, ma sě le ta kai ye, cā ma n luhu Yāhā ye. Ma'a n pye ke syi, ma pyer n tāy Yāhā ye. ²⁰ Ye sě yāā, ke ma pye ye kapee pye cīinde, pe n ye yigi ma nii ye fāy le wīi na, le yai ye ne, ye saha laa wāyīi yāā koo wāfāy na ye. Ke ma -sě pye ye kayīi pye, pe n ye yigi ma nii ye nuhu le wīi na, ye n yii ta le sě kai kua ye ye ye, ye ga wāyīi yāā le na Yāhā ye. ²¹ Ye sě yāā, Yāhā lii kε ye ye, ye naa ye laam yīn wāfāy wo. -Ye yāŋ, u Yāhā Yīndefua Crise gε ke syi wāfāy yāā ye wīi na, ma yee tee naa n yāŋ woo na, ye naa ye troho tāhā u wāŋ ter syi dyaŋ.

²² U sě kapee laa syi gε pye yāā ye, kawar wīi laa sě yi yāā u yě wo ye. ²³ U pye, wii ma u tyεhε, u saa kapāmpēe dur wāā ufua kě ye. U pye, pe ma sya u nuhu mii, u saa yee u ga wāpee pye pefa na ye, u ga u ya le soho Yāhā koho wo, Yāhā gii ke nawee sāhā cīinde ne. ²⁴ U Crise wo kapee-kur byε sya, ma tēŋ u yīŋ na, pe n sya ga u kuey mar trā na, u n ku ke ne. U loo pye ma wo ta, wo n nii nakur wāŋ syi dyaŋ kapee- wāpyeŋ kuε ye, ma -sě nii yrāŋ na, ma ga waha naa kai nkāy pye nkāy ke sroŋ. Pe Yesu tee duai, u n le sya laanyīn ne. Loo ta, kapee- nkāy byε pe tee pye wo na faale wo, koo kayaŋ n kua wo laam wo, wo n maha kadye korkor yāā. ²⁵ Ye sě yāā, faale wo, ye pye mii mbaa dyaŋ pe yi kāā u mbanaha kur ye ma -sě plaha. Yagaa, ye wee ke syi nantāŋ ye. Ye dur ba u mbanaha ye, u n nii n sēŋ ye na.

3

Ca tesě pe pa ne

¹ Ca, yii nanem byε, -ye yīnfar wāã ye pa kĕ, -ye naa n luhu pe ye! Loo ga ta, ye pa mpāy ma sya Yāhā kaplāŋ sye, pe ma ye troho wātāhā ter yāã ke yŏ, ma maha sron, loo ga waha pe ta pe bya n Yāhā kaplāŋ sya cīinde. Ye saa yii fāy yĕ kapān gε ne ye. ² Poo gε ma ye troho wātāhā ter yāã, mii le Yāhā kānde le yar mii, ma maha yāã ye nagboho ya ta pe na, pe ga sya pe naa pe troho tāhā Yāhā yor wo pe ya ndon.

³ Ye ma syi yii ta ye naa ye kadye ya wāgbihi kε, nawee-yīnde n yi naa n too ye na ye, mii ye yīnyor wāgbihi dyaŋ nsāãsugu ne, sān kāncrāŋ ngīi syi wāleŋ ne tesĕ nayreyŏr wāleŋ ne. ⁴ Ye yai ye ye laam poo gbihi, pe n yŏ pe ter ye kadye sale yaha. Ye laam ma pye pe yŏ, ma maha ma laanyīn, too syi nayŏr nde wee wākua wān ye. Loo le ma kayīi Yāhā ye. ⁵ Faalefasyam mpāy pe naa Yāhā kānde yār, ma Yāhā ta pe Yatεr, pe naa pe nayŏr kε koo syi; pe ba pe yīnfar wāã pe pa kĕ, ma naa n luhu pe ye. ⁶ Faalefasya Sara pye koo syi. U naa u troho tāhā u puai Brama yor wo, ma sya naa u yee: «Ta yīŋfua.» Yagaa ya'a nii n sron, ye ma woo Sara pueesyam. Ye saa naa n fya laa na ye.

⁷ Pa, yii byε, -ye laantor yāã ye ca kuε ye kānkai- byε wo, tee cā wa fānga wee pe na ye. -Ye naa nagboho ta pe na; Yāhā kayīi lii wāã ye kĕ, ke le wāã poo byε kĕ, loo kayīi ne le cīinde yrā wāyāã ne. Mboo wii ma yee ma sĕ laantor yāã ma cɔɔ kuε ye kānkai- byε wo ye, ye ma ba nii Yāhā nar ye syām, ke saa luhu ye kaplāŋ ye ye.

Yesu kāndeyārfa yai pe naa kasron pye wāfāy wo

⁸ Yagaa, tĕ ga lii pāã ye byε ye, -ye naa nii yīmbui nen na, tee naa n nii laantee nen ne. Ye byε, ye tyii ye ntāŋ n naa n dye yii tāy mii tuhufua nen pii wāŋ syi dyaŋ. Ye tyii ye laam n naa n tāy yii ne, waa ma syi u naa u ya puar u nampyen na ye! ⁹ Waa ma kapee laa pye ye na, ye ma

syi ye le dur ufua kē ye. Wii ma ye tyεηε, ye ma syi ye le dur ufua kē ye! Ye tyii le n kua kãã ye laam wo, -tee maha Yãhã nar, ke n kaa goo taha u na. Yãhã ye yãñ yi ye naa ye troho tãhã koo syi, ma yee ke ga ba kaa taha ye na. ¹⁰ Le ma le yrũhũ yaha Yãhã sabangbãñ wo ma yee:

«Wii ma yee driyẽ ke tãy woo na,
yay diplii n syar u ye,
ufua yai u kaplãmpee- wãpãã miy yaha
tesẽ kawar wãfua ne.

¹¹ U yai u kur waa kapee- na,
tuu kayĩ loo maha yĩñ kluε sĩĩ,
tuu naa yrĩñ poo kε u nampyerñ- ne yalebyε.

¹² Ye cã,
Yĩñfua yĩnde ma mpãy na pe kasroñ pye.
U pe Yãhã wãnar yĩmbui luhu yalebyε.
Mpãy pe -sẽ kapee- pye,
Yãhã yεr n tã poo na.»

¹³ Yoo ga waha yee, ye ma kasroñ pyefa, tuu kapee laa pye ye na loo nde wĩĩ na? ¹⁴ Ye ma kasroñ wãpyerñ maha yigi, ma -sẽ ba wãfãy yãã loo kur ye, ye cã ye yee, Yãhã ga kaa taha ye na. Ye ma syi ye naa n fya nawee- na laa ne ye, ye ma syi waa n naa ye laam wlãhã ye! ¹⁵ -Ye naa u Yãhã Yĩndefua Crise woo ya gboho ye laam wo, woo kē u ma ye Yĩñfua. Tee koho taha yaha Yesu na, mpãy ga ba naa ye yey kai- ne le wĩĩ na. Ye yai ye pe yẽ wãã sya, ye pe yar ye koho wãtahayaha wĩĩ ne Yesu na. ¹⁶ Ye ma ga pe yẽ wãã sya, -ye -sẽ naa nagboho ta pe na ye yẽ kaplãñ ne, ye naa ye laam yĩn pe ne, ye pe gbihi yar! Ye tyii ye laam n tege nii! Ke syi ne, kãnsroñ lii Yesu le yar ye na, ye n nii le yãr woo kãmay na, mpãy ma yee ye tee pye, ma nii wãpee pãã ye kãnsroñ wãyãr wĩĩ na, fyar ga pe yigi pe kaplãñ ne.

¹⁷ Le ma pye, Yãhã laam wĩĩ ne wo wãfãy yãã, wo -sẽ koo

wāfāy yāã kayĩ wāpyeŋ kur ye. Koo puar wo koo wāfāy yāã kapee wāpyeŋ kur ye.

¹⁸ Ye sē yāã, u Crise gε le sya ma ku wo kapee- wĩ na. U poo gbā ku tεhε nen ya, ma -sē wo kapee- kuā kãã wo yĩŋ na u kuāŋ ne. Woo wii tuu sroŋ, u le sya ma ku kapeepyefa wĩ na, ma yee pe waha wāã le Yāhā ne. Pe u kadye boo, Yāhā Yrā n u ta u n yir gbā wo, ma dur ba yrāŋ na gbaafa ye. ¹⁹ Loo Yāhā Yrā ne, le u ta u n ka maa le Yāhā kapāyĩ pāã mpāy ye pe ku tεr wa, pe pye mii nwompihifa dyaŋ fla ngii na pe ma. ²⁰ Poo nawee- pye faale wo Nuwε cāã na. Pe bii sye pe sē luhu Yāhā ye ye. Ke pe kuε yāŋ yāŋ laa, Nuwε n sya bii ke salangbāŋ fāã kua. Mpāy pe bii luhu Yāhā kapān ye, pe pye nawee- kuatāã ya. Poo nawee-kuatāã mii n dye ke salangbāŋ wo, ma sya yaha ke loho wo. ²¹ Koo loho nge sē nii la mii yagaa wātāãyi dyaŋ loho wo, ke ye sya yaha wa: Ye sē tãã yi koo loho wo ma yee ye ga ye kadye wey laha ye. Ye loo pye ma yee ye Yāhā nar, ke ye laam yee laha ye kē gbεgbε. Yesu Crise tuu ku ma yir gbā wo, ma dur ba yrāŋ na gbaafa ye, loo ya le ta, koo wātāãyi loho nge n waha ye sya yaha. ²² Yesu Crise ka yāhāyĩŋ na, u ma u nii Yāhā kāndigi koho kuε ye, kai- byε yĩŋ na. Yāhāyĩŋ tēnlεhε, sāndāã ter byε ne tesē fānga ter byε ne, pe byε yĩŋ kor le u kē.

4

-Ye ye faale laampee miy yaha, -tee laanfāyõm gbe!

¹ Ye cā ma yee, Yesu Crise kadye sraha wāfāy sroŋ yāã. Ye bya -ye ye laam gbihi ta, ye yii waha koo wāfāy ter syi nge na, ye naa n yāŋ Yesu na! Ye sē yāã, wii woo tuu yεr u ya kadye sraha wāfāy wĩ na ma fāy, woofua koho yi kãã kapee- wāpyeŋ wo. ² Ma gbe nanga na, ye laam wũhũ nkāy ke sē yõ ye, -ye koo miy yaha, ye naa Yāhā laam wũhũ koo

pye, ye sya ba ku! ³ Mpāy pe sē Yāhā cā ye, cāā ngii cāā tee sē ba Yesu cā wa ye, ye naa ye troho tāhā pe wāŋ ter syi dyaŋ. Ye sē waha naa yii yigi ye, ye laam wūhū sē ba yō ye. Ye pye sēnwɔnafāān. Plii byε ye naa yii wāā gbar na, ma ga naa sēm wɔ. Nkāy syi ke fūhū Yāhā ye, ye naa koo pye, ma naa ye mpar wān tēŋ. Ye tyii ye koo ngī byε wāpyeŋ miy yaha, ye ma- tēr ke wāpyeŋ na. ⁴ Yagaa, mpāy pe sē Yāhā cā ye, pe yāā tee ye troho yi kāā pe kāmpee wo, loo nde pe fe gbe, pe n sya nii ye tyεhε. ⁵ Per gaa -sē ma ke n pai, le yale nɔ wa gε nɔ wa, Yāhā ga ba pe yee, ke pe yey pe naa kapee- ngī byε pye, ma maha naa ye tyεhε yīŋ gii na. Yāhā ke per gii ta, ke n pai nakur sāhā tesē yrāŋfa byε ne, ye cā koo per sē dey kuee ye. ⁶ Ye sē yāā, mpāy bya pe ku wa pe bii le Yāhā kapāyī luhu pe ya ndoŋ. Kai- nkāy pe bii tee pye, pe wāpēn yāā koo wī na. Yāhā Yrā -sē wāsyayaha wī yar pe na le Yāhā kapāyī kāmāy na, le n waha pe ta pe n cīnde yrā yāā, lii wākuayāā wee le na ye.

-Ye ye Yāhā kayī ta Yesu kāndeyārfa wāyōŋ wī na!

⁷ Driyē wākua yale nɔ gbe taha. Loo na, -ye kacān yāā, ye yεrsaha ta ye pyer na, ye waha naa Yāhā nar. ⁸ Kai lii le -sē ma yīŋ, loo ne nde: Ye tyii ye ntāŋ n sroŋ naa n dye yii tāy busāā. Ye sē yāā, wii ntāŋ ma dye ma tāy, ufua ma sya lii tee pye ma na, u ntāŋ wādye wī ga ta, ma n le wāpee yee yi kāā ma laam wo, le n kua gbεgbe. ⁹ Wii ma ka ma kaha wo, niisaha wāā u kē, loho ne u n wɔ, ma'a n yīntaha tāhā u ne ye, ma'a n maha yee, u wāpa wī sē tāy ma ye ye. ¹⁰ Yāhā ke fāŋga tii la ye nanem byε kē, -ye cā ye yee, ye yai ye te ta, te n laa yō Yesu kāndeyārfa byε kē. Ya'a nii koo pye, ye te wāyigi cā cīnde. ¹¹ Wii ma kaplāŋ tērsaha cā, ma nii Yāhā kaplāŋ tōr n yar nawee- na, fāŋga gaa kē Yāhā wāā u kē. U ma nii Yāhā kaplāŋ tōr nawee-

ye, u -sẽ naa Yãhã kaplãn ya tɛrsaha yar nawee- na. Wii ma koho wãleŋ cã u nampyeŋ ye, ma nii koho le nawee-byɛ ye, fãnga gaa kẽ Yãhã wãã u kẽ. U -sẽ naa koho le u nampyeŋ ye koo syi. U -sẽ naa n pye koo syi, Yãhã myaha n gboho kãnkai- byɛ wo Yesu Crise kãmay na. Ye sã yãã, kai- byɛ fãnga ma tãŋ Yãhã koho wo nayõr ne. Wãkuayãã wee yãã koo ngĩ na ye. Amɛn, le nii ke syi.

Ye ma wãfã yãã Yesu wĩ na, ye tyii le n naa n tã y ye ye!

¹² Ta naambiyãm, Yãhã ke ye tãn n yãŋ wãfã y gii ne yagaa, ye ma syi le n ye fe gbe, le nii ye ye kafuẽ laa ye, lii syi le sã yai le ye dye ye. ¹³ Tee mii, ye wãfã yãã, ye tyii le n nii ye ye nuhu wĩ! Ye sã yãã, u Yãhã Yĩndefua Crise wãfã y ter kẽ tee n sya. Loo na, u maa dur ba u nayõr ne nawee- byɛ yĩnde na, le ga ba nii ye bya ye laanfĩr wĩ. ¹⁴ Ya'a yãã, pe ye tyɛhɛ Yesu kãnde wãyar wĩ na, -ye ta le n nuhu yigi ye kẽ. Ye sã yãã, Yãhã Yrã ma ye na, ma ta Yãhã nayõr yirfua ma ye na. ¹⁵ Yii waa ma syi u wãfã yãã kapee laa wãpyeŋ kur ye mii nawee wãboo dyaŋ, laa na kla gaa wãyuhu, laa na kapee laa ter wĩ na tesẽ nagblaha wĩ laa ne ye. ¹⁶ Pe ma -sẽ nii yii waa fã y, ma yee u ma Yesu kãndeyãrfua, ufua ma syi u yee fyar woo yigi loo nde ne ye. U -sẽ naa Yãhã sey, koo gii ke u ta, u n waha u troho tãhã Yesu kãnde wo.

¹⁷ Yale nɔ wa, Yãhã kasãhã ga yir yagaa. Ke ga cãã fe gbe Yãhã pii poo na. Wii mpãy too ma Yãhã pii, le ma -sẽ cãã fe gbe wii na mma ma syi dyaŋ, mpãy pe le Yãhã kapãyĩ sye, poo wĩ -sẽ ga ba nii mii? ¹⁸ Ye sã yãã, mpãy pe sroŋ, pe yĩŋ wãwlohoyi wĩ ma war, mpãy pe pee tesẽ kapeepyefa ne, poo wĩ -sẽ ga ba nii mii?

¹⁹ Loo na, mpây pe wăfăy yăă Yăhă koe koho na, pe yai pe kuee kayŭhŭ ya wăpyeŋ wo, pe pe ya le soho pe kuăŋ ne Yăhă koho wo, Yăhă gii ke wăn kur bye tăhă, koo gii ke ma yĕ tĕr wo ye lii ne, ke ga le pye wo kĕ.

5

-Ye Yesu kăndeyărfă yigi yŏ, ye naa n sĕŋ pe na!

¹ Yii mpây tee ma Yesu kăndeyărfă yahaseefa, yii me tĕ n yăŋ yagaa. Ta bya, n ma Yesu kăndeyărfă yahaseefua nii ndoŋ. U Yăhă Yĭndefua Crise tuu wăfăy gii făy, n ke yăă yĭnde ne. U ma ba dur ba u nayŏr ne tesĕ u făŋga ne, ta bya ga ba koo yăă u flăhă tăy nii ndoŋ. Tĕ yee n ga lii păă ye ye, loo ne nde: ² Yăhă ke Yesu kăndeyărfă mpây le soho ye koho wo, -ye pe yigi yŏ! -Ye naa pe yăŋ ye naa n sĕŋ pe na, mii mbanaha dyaŋ u mbaa ne. Tee le ta le n nii ye laam wĭ, ye ma syi ta le n nii ye ye făŋga wĭ laa ye. Loo le n tăy Yăhă ye. -Ye naa koo ngĭ pye pe kĕ ke dyaŋ laantee nen ne, ye ma n naa wale wĭ wŭ le wo ye! ³ Yesu kăndeyărfă mpây pe ma ye koho wo, -ye naa n sĕŋ pe na! Ye ma syi ye yii ta ye kuă tă pe na ye, -ye nii pe ye cĭinde yahaseefayŏm, pe n waha naa n yăŋ ye na. ⁴ Ye ma nii ye troho tăhă ke syi, Yesu Crise wii u n sĕŋ wo bye na, mii mbanaha dyaŋ u mbaa ne, u ma ba dur ba, u ga ba kayŭhŭ gaa wăă ye kĕ, kii syi ke ma myaha ne, wăkuayăă wee ke nayŏr na ye.

⁵ Naanfăm, -ye yĭŋ kor naa n le yahaseefa kĕ! Ye bye, yii naanfăm tesĕ wăle ne, waa ma syi u naa u ya puar waa na ye; -ye naa kayŭhŭ pye yii kĕ! Yăhă sabangbăŋ ge laam wo, le ma le yrŭhŭ ta nii ma yee:

«Yatanfa wĭ sye Yăhă ye.

Mpây pe -sĕ pe ya tege tăă ye,

Yăhă ke laantăr yar pe na.»

⁶ Loo na, -ye yii tege tãã ye Yãhã yĩnde na, koo gii ke ma fãnga ne. Ye ma loo pye, Yãhã ga ba yalaale yãñ, ke ye kuã yir ncaha ye. ⁷ Ye laam wũhũ nkãy byε ke ye fãý, -ye ke byε ta ke n nii koo yĩñ wũhũ. Ye sē yãã, koo kē ke n sēñ ye na.

⁸ -Ye naa ye laam wũũ, ya'a n faha yii yaha ye! Ye sē yãã, ye napĩ Setane ma mii jar wãñ syi dyañ, tuu n syii ma gbey n klaha, ma n kε u ma wii yãã yigi u u kaa. ⁹ -Ye yii waha ye u wĩ sye, -ye Yesu ya ta ye Yatεr, Setane ma n ye yãã yigi ye! Ye cã ma yee driyē kur byε wo, ye nampyeñ-mpãy pe n yãr Yesu kãnde wo, pe bya ma koo wãfãý nge na ye wãñ syi dyañ. ¹⁰ Ye ma faa fãý car, yalaale ma ba nɔ, Yãhã gii ke kayũhũ ter byε wãã nawee kē, ke ga dye ye ye, ke ye ta ye n kuee yai tãñ ke nayõr wo, ye seefar rii wĩ na tee le Yesu ne. Yãhã ga ye ta ye n nii nawee- mpãy syi ke n kε. Ke ga ye ta ye n lε ke kãnde wo. Ke ga fãnga wãã ye kē. Ke ga maha ye ta ye n kuee le Yesu kãnde wo laantee nen ne. ¹¹ Yãhã ya kē, ke ma fãngafua, wãkuayãã wee ke fãnga na ye. Amεn, le nii ke syi.

Ke kaplãñ kuasaha fla tesē syaha ne

¹² Silaasyi kē tuu ra koho soho, ta n waha sabagberle nwo yrũhũ ma nɔ wãã ye kē. Tē lii yãã u kuε ye, u n sroñ Yesu kãnde wo. N kaplãñ ngĩ yrũhũ ye kē ma yee, n ga ye laam gbã, tē ye yar, ye n cã ye yee, lii tē tõr yar ye na saba nwo laam wo, loo ne le ma le cĩnde Yãhã laantãr wĩ. Yãhã loo wãã wo kē, -ye le gbihi le yaha ye laam wo!

¹³ Yesu kãndeyãrfa yawãhãfa mpãy pe ma Babilon wo, poo mpãy Yãhã pe yãñ yi ye wãñ syi dyañ, pe byε ye syar. Marεkε wii u nii ra dya Yesu kãnde wo, u bya syaha wãã ye kē. ¹⁴ -Ye naa syaha wãã yii kē, mii tuhufua nen pii wãñ syi dyañ pe ntãñ dye pe ya tãý. Yãhã ke yrĩñ wãã ye byε kē, yii mpãy tee seefar le u Yãhã Yĩndefua Crise ne.

YĀHĀ NAAMBIYĀRFĀN SABA

Karaboro, Eastern: YĀHĀ NAAMBIYĀRFĀN SABA New Testament
copyright © 1993 Wycliffe Bible Translators, Inc.

Language: Eastern Karaboro

Contributor: WBT Central Zone

All rights reserved.

2020-11-17

PDF generated using Haiola and XeLaTeX on 14 Jun 2022 from source files dated 13 Jun
2022

15120496-00e2-503a-8d40-2d7cfdc1ba5b